

Abeha no solamente ta traha honing, sino ta vital pa bida riba mundo

Santa Rosa ta splica riba e importancia di abeha



RECIENTEMENTE por a tuma nota cu rond di mundo abehanan ta wordo mata na cantidadnan halto dor di pesticida y e ser humano.

Mirando e rol grandi cu e tarea di e abehanan ta hunga den e polonisacion di agricultura y flora rond di mundo como tambe na Aruba, Santa Rosa ta uni su mes na diferente instancianan internacional pa trece conscientisacion y informacion riba e importancia di e insectonan aki. Cada aña abehanan ta polonisa 90% di mata y plantacionnan rond di mundo y den e forma aki ta genera mas cu 1/3 di alimentonan mundial. Tin mas cu 100 mata cu ta depende completamente riba e polonisacion di abeha pa por produci nan fruta y berduranan. Ta trata di matanan

manera maishi, appel y awacati. Estudionan haci dor di e Nacionnan Uni a comproba cu sin un accion inmediato pa salba e insectonan aki hopi fruta y berdura no lo existi den futuro.

E trabou di e abeha ta uno sumamente importante pa bida riba mundo, mirando cu sin polonisacion matanan lo no produci y ni e ser humano, ni animalnan lo tin alimento pa sobrevivi.

Honing cual e abeha ta produci ta trece cune hopi beneficianan pa e salud di e ser humano, manera entre otro ta preveni cancer y problema di curason, ta actua como anti bacteria, ta yuda contra tosamento y iritacion di garganta, ta regula sucu y ta yuda cura herida nan.

Santa Rosa como Departamento di Agricultura, Cria y Pesca kier pone enfasis riba e rol grandi cu abehanan ta hunga den e agricultura y flora di Aruba y pa e motibo aki ta pidi pueblo completo colaboracion den e mantencion y cuido di e abeha.

Santa Rosa ta duna servicio na esunnan cu tin molester di neishi di abeha, unda cu esakinan ta wordo colecta y transporta pa Santa Rosa pa sigui cu nan tarea importante di produccion di honing y polonisacion.

Pa mas informacion tocante e tarea di Santa Rosa encuanto abeha, of pa meld molester di abeha por tuma contacto na # 585-8102 for di dialuna pa diabierna y durante weekend na 594-6096.